



01745004

第十四冊 詩文類之二·之三

雪廬詩集 上、下
雪廬寓臺文存



李炳南老居士全集編輯委員會 印行

國家圖書館出版品預行編目資料

李炳南老居士全集/李炳南老居士著述

再版-臺中市:青蓮 2006[民95]

冊 公分

ISBN 986-82029-6-5 (第十四冊:精裝)

1. 論叢與雜著

078

95001524

普為出資及受持展轉
流通者回向偈曰

願以此功德 消除宿現業
增長諸福慧 圓成勝善根
所有刀兵劫 及與饑饉等
悉皆盡滅除 人各習禮讓
一切出資者 展轉流通者
現眷咸安樂 先亡獲超昇
風雨常調順 人民悉康寧
法界諸含識 同證無上道

雪廬詩文集重印序

立言、立德、立功，古稱三大不朽。夫有言者，必先有其德；德立而後言，近之、足以輔世長民，贊化育而開務成物；遠之、足以移風易俗，立人極而維綱常；誠如是，則功自在其中矣。吾于並世，惟李君炳南，其庶幾焉。

君、稷下士也。博聞強記，于學無所不窺。自遊衍聖公之門，縱覽古聖人文物制作之盛，與夫禮樂衣冠之美，流風遺韻，彷彿猶在耳目間。學益積，而行益飭。抗戰軍興，君隨孔公辟地巴蜀之歌樂山，與予衡宇相望，因得識焉。當是時，敵機晝夜肆虐，來山追茅者踵相接，山等培塿，高僅數百尺，食水時虞不足。予于山半，

偶得涓涓之流，晝夜不舍。乃倡議防之以隄，衆然之，功未半而予有遠行，遂以累君，終底于成。節餘四元五角，無法處理，悉以贈國校；夫敬大事者，必不遺小節，是以古德有言之一丈，不如行之一寸之誠。此爲予與君定交之始。及辟秦亂，乘桴浮海，相值臺中，不禁歔歔久之。時當光復之初，醫工缺如，病患投門無所，君故知醫，日夜奔馳各寺廟間，方藥兼施，活人無算，衆感君之無緣大慈也，咸稱李老師而不敢名。

君于佛法，初弘禪密，自遇靈岩大師，始悟末法人根鈍劣，欲攝群機，莫淨土若，遂仿廬山蓮社遺制，定時演化，從如歸市。臺瀛佛教，經日閱六十年之矯揉改作，面目全非。君于菩提樹月刊，

關佛學問答，剖析疑難，循循善誘，正法漸明。復創辦大專暑期佛學講習會，自是莘莘學子，得知世間尙有理智正信之宗教，君與周宣德居士桴鼓相應之力也。復爲救濟院，育幼、安老、醫藥具備；使少有所懷，老有所養，病有所託。規模雖不甚宏，然已竭其力之所能盡矣。

初蓮社之落成也，本關一室以居君；君不欲啓世人以稗販之漸也，故虛之。仍自侷促于伸手晝不見五指之陋室中，撰述法言，接納賓朋，日不暇給，宴如也。君之自律如是，殆有得于孔顏之樂者？而又練達世情，待人接物，無不謙遜自下；惟有從君聞一義者，不問貧富、貴賤、男女、老幼，咸以師自居，而人不以爲慢。即或誕

謾之徒，一及君門，類能繩墨自守，師道立而後善人多，其君之謂與？抑吾聞之：古者輶軒采風，所集皆匹夫匹婦之言，良以閭巷心聲，有如天籟，其鳴其止，初無得失容心于其間，故曰：詩無邪。今臺中之婦孺老幼，一及李老師，無問識與不識，咸翹大拇指，以示其崇敬之意；余每見之，輒爲動容不置。夫君之于臺中，一流寓布衣耳，而能輿頌若是，夫豈偶然者哉。使輶軒之制猶存，必不遺此閭巷之言也。

歲在戊申，君年八秩，門弟子周君邦道等，嘗裒君詩文，付之梨棗，顏曰：雪廬詩文集，用介眉壽。雪廬，君之字也。初擬另選有關佛學詩文，都爲一集，列入中華大典。嗣以所述什九皆闡佛法，

遂增益八十以後篇章，並爲彙編上下冊。以予與君，相見于危躋屯剝之世，凡三十餘年，命一言以詔來茲。君之詩文，在吾國文學史上之地位，蔡周二序，言之已審，固無俟予之嘖嘖爲。君與予同庚同月，約浹辰而長，故嘗以兄事之。若論君之品學，則吾師也。予性鯁直，偶有所見，必盡言無隱，而君不以爲忤，知予出于至誠也。殺爲性戒，爲佛弟子，首宜止持。予嘗殺螞蟻百數，蟑螂十數，君聞之愀然！急爲懺悔，其與人爲善如是！然頑劣難改，隨懺隨作，最後爲追撲一蟑螂而竟自折其腿，報應之速如是，可不懼哉！自惟八六衰年，嬰此重病，當無生理，承君數數臨視，頻餽以參，遂以後事相託：不訃告、不受弔、不用俗樂，火葬後，入塔保存。君慰

曰：當不致此；設或不幸，唯命是從。慨自弱冠奔走衣食，八十年間，相識徧天下，而生死可託者，惟君一人而已，能勿感慨係之。夫以君之諒德世聰，明體達用，凡有所言，皆足以振發人心，垂爲世範，雖無意于立言，而已深得古人立言立德之旨，世有中「禮教爲殺人之利器」、「孝道爲高利貸」之毒者，讀君言，不替一服清涼敗毒散也。爰自忘病困，雜書所感，聊以塞責；若言序君文，則吾豈敢。

中華民國六十三年九月樂清朱鏡宙敬識於臺中菩提醫院

雪廬述學彙稿序

自佛教東來二千年中現居士身以淨土法門鼓舞當時沾溉後世者
吾得三人焉曰宋之王龍舒清之周安士彭二林若夫傳記所載遠者如宗
少文劉遺民近者如袁中郎昆仲乃至並世之楊仁山丁仲祐諸公何啻千
百人然或勤於自修而疏於接衆或富於著作而簡於講說即龍舒安士二
林三大老其於自行化他信今傳後亦有未若今日之盛者則 李公雪廬
之高樹法幢接納群品其爲不可及已 公濟南人居近聖人之鄉嘗入衍
聖公幕於周孔遺教習之熟矣而獨能舍儒從佛遍研各宗皈心淨業違難
南來稅駕臺中最初偶假寺廟靜室披演梵筴寢假而從如歸市建立臺中
蓮社建立菩提樹雜誌社建立慈光圖書館建立保護動物會建立慈光托

兒所建立慈光育幼院建立菩提醫院而最後匯爲菩提救濟院舉臺灣遠及港澳南洋各地無不知有李老師者 公於各慈濟機構一一精心擘劃務底於成逮規模既備則轉付他人主持於己若無所與者而惟以講經說法爲事因聽衆職業不同根器有異分爲數地各有定時 公往來其間雖風雨寒暑不爽晷刻其說融合性相導歸安養座下千指戶限爲穿及門高足亦各分座分時以廣法施拈珠數息者相望於道更於菩提樹雜誌社特闢答問一欄問者雖猥瑣支離亦必委曲詳盡務釋其疑又憫晚近學者迷於唯物謬說特於大學專科學生寒暑假期中在臺中設講習班給其膳宿爲之講解佛法凡來學者莫不如醍醐灌頂悔向者所見之不廣也又精醫理定期施診全活無算此特其餘事耳信衆多請皈依 公以白衣不傳皈

戒則爲介紹名德通信接引又兩次禮請天寧堂上證下蓮和尙啓建戒場
第二次得皈戒者千餘人因名之曰千人戒會余亦幸與其列則 公之益
我不亦多乎以上偶有一端足徵其爲乘願再來而 公以一身兼之迄今
蓋十有八年此十八年中 公無一時一刻不殫心於宏法利生雖眠食不
得從容客有問者則曰忙忙夫世人所忙者官爵利祿妻子田宅飲食遊樂
而公不與焉 公寄身斗室無眷屬之奉日中蔬食賴及門弟子輪流供養
雖苦行頭陀不是過也則 公之所謂忙者豈不以三界未空衆生多苦有
以使之然耶凡 公所行雖求之於龍舒安士二林三大老容有未逮遑論
其他蓋修己或由勝行而度人兼須福報 公之遠業輝煌亦其體力有以
副之迄今年登八十起坐便捷步履輕利望之如五十許人則天之降大任

於是人也豈偶然哉今年夏曆十二月初七日爲公八十整壽高足弟子周慶光邦道許慎獨祖成朱時英斐徐醒民周家麟江秀英諸居士發起哀集公之生平著述包括佛學醫學文學等爲雪廬述學彙稿刊刻行世慶光方任考選部政務次長兼主中華學術院中華大典宗教類編纂將更精選其中有關佛學之專著及詩文顏曰雪廬闡佛彙稿列入中華大典以介眉壽夫以公之體道觀空於身外之名豈復置意惟此二編大則宏經衛道小則化民成俗與紀述遭逢流連光景之辭迴乎異趣從此壽之梨棗使百世之下聞者莫不興起於公救世之心寧不稍愜余於公所爲文章未能盡讀然已稍窺端倪而居同里閭又嘗濫厠法筵因於公之立身行道就所聞知者略書梗概蓋惟有是人而後有是文他日書萬本而誦萬徧

者大有人在又豈以余言爲輕重乎

中華民國五十七年戊申十一月之吉

國民大會代表滿分優婆塞念生蔡運辰法名寬運謹識

雪廬詩文集序

吾師 李雪廬先生，菲枕載籍，著書滿家，於經學、史學、文學、法學、佛學，乃至醫學，莫不淹貫。而戴仁以行，抱義以處，栖栖皇皇，席不暇暖；是誠博綜淵懿，瑰琦雋偉，堅苦卓絕之耆碩矣！師於佛，初從南昌梅擷芸大士學唯識，次學禪，次學淨，次學密，而最後皈依印光大師，耑修淨業；意謂三根普被，九界同歸，契引群萌，度登彼岸，未始有勝於此匡廬遺躅者也！當代弘揚淨宗在家大德，屈指推江易園、丁仲祐、許止淨、夏蓮居、范古農、江味農、李圓淨、聶雲臺、黃涵之、徐蔚如、王博謙、戰德克、朱鐸民、蔡念生、毛惕園、方心五諸氏。師聲應氣求，嚶鳴其間，東渡

瀛壖，勇猛精進，遂爲靈巖龍象。二十年來，講經說法，廣作佛事，幾無虛時虛日。不特沾溉羣衆，即如勸設蓮社、圖書館、幼稚園、托兒所、育幼院、救濟院、醫院、施診所、安老所、大專學生暑期佛學講座，亦胥爲各方所景仰、所則效。識者譽之爲金粟前身，維摩乘願，詎偶然哉！

師融通儒釋，深積義理。敦倫盡分，閑邪存誠，恪承印祖遺教。而以文字般若，宣流法音，不廢觚翰。民國五十七年戊申季冬，師慶八秩；學佛同人，哀師平生著述八種，都爲「雪廬述學彙稿」，印行以壽，蔡念生居士旣以大文弁首。茲詩文集殺青，則命邦道贅序其端，自省舛陋，輒不勝惶悚！